

Minister Mike de Meza: Mester tin un balansa entre desaroyo socioeconomico y proteccion di nos naturalesa

RECIENTEMENTE Minister Ing. Mike de Meza tabata di bishita na Parke Nacional Arikok, cual resorta bao di su maneho como e mandatario encarga cu medio ambiente. E titular di asuntonan economico, comunicacion, energia y medio ambiente a gosa di su bishita na

e parke cu ta consisti di un area di 18% di e superficie total di Aruba. E meta di e parke ta pa preserva y proteha naturalesa di Aruba, incluyendo flora, fauna, pero tambe infraestructura natural manera e cuebanan.

Minister de Meza a splica cu e

promocion mas intensivo di e parke mester percura pa atrae mas bishitante, tanto local, como turista. Esaki ta yuda promove e beyesa y diversidad di nos naturalesa, como tambe e importancia di su preservacion. Ademá, e entrada for di e tarifa cu ta wordo cobra di entrada ta contribui na e trabao di preservacion den diferente faceta.

Expansion di e lista di areanan na Aruba cu ta cay bao di un maneho di proteccion ta wordo considera, Minister De Meza a bisa. Parlamento unanimamente algun tempo pasa a aproba un mocion pa urgi gobierno pa considera 15 luga mas na nos isla pa cay bao di un maneho di proteccion y lo traha riba esaki tambe, segun e mandatario. El a subraya cu ta sumamente importante pa e desaroyo socioeconomico ta den balansa cu proteccion di naturalesa y e tin oido y atencion pa esaki. Particularmente den su funcion como minister di economia, energia y medio ambiente, e interes di Minister De Meza ta pa tin un balansa den e relacion entre e factornan importante aki.

Minister De Meza a bisa enfaticamente cu un pais cu ta considera su mes desaroya – aunke esaki ta conta pa tur pais, paisnan menos desaroya tambe, cu tin desbalansa entre e desa-



royo socioeconomico y e cuidio pa su medio ambiente no ta sostenibel. Paisnan cu laga nan naturalesa na caya, cu laga nan medio ambiente bay fo'i man, no ta sostenibel, el a expresa. Tin dos parti cu mester semper enfoca riba dje, cual ta e parti di conscientisacion/prevencion y e parti di represion. Ta esencial pa e comunidad di chikito pa grandi ta consciente di nan conducta pa cu naturalesa, y di otro banda tambe tin cu tin sancion pa esunnan cu no ta tene nan mes na trato y un conducta aceptabel.

Minister De Meza a comenta cu su ministerio lo ta bayendo Parlamento cu cierto ley y lo ta trahando riba e curso pa certifica e trahadonan di e departamento di City Inspector como “bu- itengewoon agent van Politie”, e park rangernan y personanan cu ta traha cu e Departamento di Medio Ambiente. Esaki lo

haci posibel pa actua cu mas duro contra e personanan cu ta defrauda nos medio ambiente, entre otro cu dumpnan ilegal.

“Aruba ta hopi chikito, Aruba ta un paradijs. Si no ta pa nos naturalesa Aruba hamas lo por tin un sector turistico cu ta sostenibel,” el a bisa añadiendo cu si no cuida loke nos tin “ta yega un momento cu e pais aki ta bira gewoon un pida baranca cu no tin nada riba dje y mahos.”

Minister Mike de Meza ta expresa aprecio y gradicimento na tur persona cu si ta cuida y respeta nos medio ambiente. Y, su mensahe den direccion di personanan cu no ta respeta nos naturalesa ta hopi cla: “Nos tin cu treed op duro, e no ta aceptabel y nos no por tolera tampoco” pa e hendenan aki sigui anda na un forma destructivo cu nos medio ambiente.